

CENTRALNA BANKA  
BOSNE I HERCEGOVINE  
Broj: UV-150-01-1-1905-6 /20 ŽB  
Sarajevo, 08.10.2020. godine

Na osnovu člana 70. stav (1) i (3) Zakona o javnim nabavkama (Službeni glasnik BiH, 39/14), a u vezi s odredbama Pravilnika o postupku dodjele ugovora o uslugama iz Aneksa II Dio B Zakona o javnim nabavkama (Službeni glasnik BiH, broj: 66/16), člana 49. stav (2) Pravilnika Centralne banke Bosne i Hercegovine, broj: UV-104-01-1-116/15 od 28. decembra 2015. godine i člana 13. stav (2) Pravilnika o javnim nabavkama, broj: UV-122-01-1-11/18 RJ od 30. januara 2018. godine, Upravno vijeće Centralne banke Bosne i Hercegovine na 13. sjednici od 29. septembra 2020. godine, donosi

#### O D L U K U

o izboru najpovoljnijeg ponuđača u postupku javne nabavke usluga  
proizvodnje kovanog novca u apoenima 1 KM, 50 F, 20 F, 10 F i 5 F

##### Član 1.

(1) Centralna banka Bosne i Hercegovine (u daljnjem tekstu: Centralna banka) ugovor za nabavku usluga proizvodnje kovanog novca u apoenima 1 KM, 50 F, 20 F, 10 F i 5 F (u daljnjem tekstu: kovanice KM) dodjeljuje ponuđaču The Royal Mint Limited, Ujedinjeno Kraljevstvo.

(2) Postupak javne nabavke iz stava (1) ovog člana proveden je u skladu s Pravilnikom o postupku dodjele ugovora o uslugama iz Aneksa II Dio B Zakona o javnim nabavkama (Službeni glasnik BiH broj: 66/16).

##### Član 2.

(1) Ponuda ponuđača iz člana 1. ove odluke, glasi na iznos od

2 451 750,00 EUR

(slovima: dvamilionačetiristotinepedesetjednahiljadaisedamstotinapedeset eura i 00/100)

(2) Zadužuje se Odjeljenje za bankarstvo Centralnog ureda Centralne banke Bosne i Hercegovine da, u skladu s uslovima iz ugovora koji će se zaključiti na osnovu Zakona o javnim nabavkama, izvrši plaćanje dobavljaču na račun koji naznači na fakturi.

##### Član 3.

Centralna banka će, po sticanju uslova za zaključenje ugovora na osnovu Zakona o javnim nabavkama, s izabranim ponuđačem iz člana 1. ove odluke, zaključiti ugovor na period od četiri godine, za čije se izvršenje zadužuje Odjeljenje trezora Centralnog ureda Centralne banke Bosne i Hercegovine.

##### Član 4.

Centralna banka će o rezultatima provedenog postupka javne nabavke obavijestiti sve ponuđače, koji su učestvovali u postupku javne nabavke.

##### Član 5.

Za realizaciju ove odluke zadužuju se Odjeljenje za računovodstvo i finansije i Odjeljenje za javne nabavke Centralnog ureda Centralne banke Bosne i Hercegovine.

##### Član 6.

Ova odluka, će se objaviti na web stranici Centralne banke [www.cbbh.ba](http://www.cbbh.ba) istovremeno s upućivanjem ponuđačima koji su učestvovali u postupku javne nabavke, u skladu s članom 70. stav 6. Zakona o javnim nabavkama („Službeni glasnik BiH“, broj: 39/14).

##### Član 7.

Dio sredstava za realizaciju nabavke, a koja se odnose na 2020. godinu planirana su Finansijskim planom Centralne banke za 2020. godinu, a ostatak sredstava koji se odnosi na naredne godine biće planiran finansijskim planovima za te godine.



## O b r a z l o ž e n j e

Postupak javne nabavke usluga proizvodnje kovanica KM, pokrenut je Odlukom broj: 150-07-1-1081-2/20 SAK od 7. aprila 2020. godine.

U skladu s članom 8. stav (1) Zakona o javnim nabavkama u Bosni i Hercegovini (Službeni glasnik BiH, 39/14 – u daljnjem tekstu: Zakon o javnim nabavkama) i članom 7. stavovi (3) i (4) Pravilnika o postupku dodjele ugovora o uslugama iz Aneksa II Dio B Zakona o javnim nabavkama (Službeni glasnik BiH, broj: 66/16), Centralna banka je, 10. juna 2020. godine, na web stranici [www.cbbh.ba](http://www.cbbh.ba) objavila Poziv za dostavljanje ponuda za prvu fazu – fazu pretkvalifikacije, broj: 150-07-1-1081-5/20 (daljnjem tekstu: Poziv) i uputila ga na tri adrese.

U predviđenom roku, tri ponuđača su blagovremeno dostavila dokumentaciju za učešće u prvoj fazi ovog postupka javne nabavke: The Royal Mint Limited, Ujedinjeno Kraljevstvo; MONNAIE DE PARIS, Francuska Republika i UAB Lietuvos monetu kalykla, Republika Litva.

Na osnovu preporuke komisije, nadležne za provođenje postupka javne nabavke, a u skladu s članom 70. stav (5) Zakona o javnim nabavkama (Službeni glasnik BiH, 39/14), Centralna banka je donijela Odluku o rezultatu pretkvalifikacije u postupku javne nabavke usluga proizvodnje kovanica KM, broj: UV-150-01-1-1609-4/20 ŽB od 6. augusta 2020. godine, kojom je ponuđač The Royal Mint Limited, Ujedinjeno Kraljevstvo, ocijenjen kvalifikovanim za učešće u drugoj fazi postupka – fazi dostavljanja početnih ponuda i pregovora.

Postupajući po navedenoj odluci, Odjeljenje za javne nabavke je izradilo Poziv za dostavljanje ponuda za drugu fazu – fazu dostavljanja početnih ponuda i pregovaranja i dostavilo ga kvalifikovanom ponuđaču iz prve faze postupka, 26. augusta 2020. godine.

Kvalifikovani ponuđač iz prve faze postupka je dostavio svoju ponudu, u predviđenom roku za dostavljanje ponuda.

Komisija je izvršila pregled dostavljene ponude i zaključila da je ponuđač dostavio svu traženu dokumentaciju za učešće u drugoj fazi postupka.

Prethodno navedenim pozivom za drugu fazu postupka je predviđeno održavanje pregovora s ponuđačem, elektronskom poštom, u slučaju dostavljanja tražene dokumentacije za učešće u drugoj fazi postupka.

Početna ponuda ponuđača je iznosila 2 524 050,00 EUR, dok je na pregovorima ponuđač dao popust u ukupnom iznosu od 72 300,00 EUR, tako da konačna cijena ponude iznosi 2 451 750,00 EUR.

Komisija je Zapisnikom o pregledu i ocjeni ponude, broj: 149-07-1-1528-8/20, od 18. septembra 2020. godine, dala preporuku kao u dispozitivu.

### **Pouka o pravnom lijeku:**

Protiv ove odluke može se, u pisanoj formi, uložiti žalba Centralnoj banci Bosne i Hercegovine u roku od deset dana od dana dostavljanja ove odluke.

Predsjedavajući Upravnog vijeća  
Centralne banke Bosne i Hercegovine  
GUVERNER

dr. Senad Softić



Dostaviti:

- guverneru;
- članovima Upravnog vijeća;
- viceguvernerima;
- Uredu glavnog internog revizora;
- sekretaru Uprave i Upravnog vijeća;
- Odjeljenju trezora;
- Odjeljenju za bankarstvo;
- Odjeljenju za računovodstvo i finansije;
- Odjeljenju za javne nabavke;
- u spis predmeta;